

## Mabadiliko Kupitia Kristo

*Hata imekuwa, mtu akiwa ndani ya Kristo amekuwa kiumbe kipya; ya kale yamepita tazama! Yamekuwa mapya—2 Wakorintho 5:17.*

**M**abadiliko makubwa hutokea katika tabia ya yule anayempokea Yesu; kwa maana “mtu akiwa ndani ya Kristo amekuwa kiumbe kipya.” Tunapowaona wale ambao wanakiri kuwa Wakristo wakionesha tamaa za mwili za zamani katika maneno na matendo, tunaweza kujua kwamba hawako ndani ya Yesu, kwamba neema ya Kristo ibadilishayo haijaigusa nafsi, haijaifinyanga tabia, na kusafisha uchafu wa moyo....

Wale ambao wana uzoefu wa neema ya Yesu watahisi wajibu wao Kwake ili kuwa wawakilishi wa uweza Wake kwa ulimwengu. Wanatambua kuwa Yeye asiyejua dhambi alifanywa kuwa dhambi kwa ajili yao, ili waweze kufanywa kuwa haki ya Mungu ndani Yake. Kuuthamini ukweli huu kutatuwezesha kupata mitazamo sahihi ya kazi ya Mkombozi wetu. Waumini wa kweli watatambua kwamba wakati wakiwa wametengwa mbali Naye kwa kuwa na mioyo migumu na dhambi, Hakuwaacha, lakini badala yake Aliwaombea, ili kwamba waweze kupata faida ya wokovu ambao alikuwa amewanunulia kwa kafara isiyo kifani. Kwa kumpokea Yesu wanajua kwamba wanalazimika kutoka ulimwenguni, na kutengwa, na kutogusa vitu najisi, ili wapate kuwa wana wa Mungu. Lazima wampende Yesu sana.

Haiwezekani kwa watu wenye ukomo kujua thamani ya haki ya upendo wa Mungu kwa viumbe Wake walioanguka. Daima tuko katika hatari ya kusahau upendo huu, kwa sababu tunashindwa kuutafakari, na tunajiachia kutekwa katika mambo ya dunia hii. Tunairuhusu mioyo yetu kutengwa kwa kupenda mambo ya hapa duniani, na hivyo kutengwa na Chanzo cha kweli cha furaha.

Yesu anapaswa kuwa mada ya fikra zetu, kipenzi cha mioyo yetu. Inatupasa kuruhusu akili zetu kudumu katika kutafakari tabia za thamani za Bwana wetu; tunapaswa kuzitafakari ahadi tele za Neno Lake; inatupasa kuyawazia mambo matukufu ya mbinguni. Hatupaswi kuridhika na maono ya mara moja ya Mkombozi wetu, lakini nia zetu zinapaswa kukazwa juu ya Mungu kwa kulitegemea Neno Lake daima. Inatulazimu kuyachunguza Maandiko kwa bidii ili kwamba tuweze kuelewa madai ambayo Yesu anayo juu yetu, na ili kwamba tuweze kuwa na mawazo sahihi ya ukweli. Mapenzi yetu sharti yatiishwe, na kuletwa katika mapatano na mapenzi ya Mungu.

Nuru ya thamani imeruhusiwa kung'aa katika njia yetu, na kando yetu wako malaika wa mbinguni, ambao wanapenda mafanikio yetu.... Upendo wa Kristo uliooneshwa kwetu katika maisha Yake ya fedheha na kujikana nafsi, katika kifo Chake pale Kalvari, yanapaswa kutufanya kuimba nyimbo za shukrani midomoni mwetu. Tumaini la ujio Wake wa hivi karibuni linapaswa kutujaza kwa furaha takatifu (**The Signs of the Times, Desemba 8, 1890**).